

PREDNACRT

Na osnovu člana 16. Zakona o upravi („Službeni glasnik BiH“ br. broj 32/02 i 102/09), člana 48. alineja 3) Okvirnog zakona o visokom obrazovanju u Bosni i Hercegovini, („Službeni glasnik BiH“ br. 59/07 i 59/09), člana 6. i člana 12. Statuta Agencije za razvoj visokog obrazovanja i osiguranje kvaliteta („Službeni glasnik BiH“ br. 86/09), direktor Agencije za razvoj visokog obrazovanja i osiguranje kvaliteta uz saglasnost Upravnog odbora Agencije za razvoj visokog obrazovanja i osiguranje kvaliteta, sa __ sjednice, održane _____. godine, donio je

PREPORUKE O KRITERIJIMA I STANDARDIMA MINISTARSTVU REPUBLIKE SRPSKE, KANTONALNIM MINISTARSTVIMA I BRČKO DISTRIKTU BIH ZA OSNIVANJE I ZATVARANJE VISOKOŠKOLSKIH USTANOVA, TE ZA PRESTRUKTURIRANJE STUDIJSKIH PROGRAMA

1. SVRHA I CILJ PREPORUKA

1.1. Svrha preporuka

Svrha ovih preporuka je da posluže nadležnim obrazovnim vlastima u Bosni i Hercegovini za definisanje harmoniziranih kriterija i standarda za osnivanje i zatvaranje visokoškolskih ustanova te za prestrukturiranje studijskih programa.

1.2. Cilj preporuka

Cilj preporuka o kriterijima i standardima je da visokoškolske ustanove osiguraju primjenu najviših standarda u obavljanju djelatnosti visokog obrazovanja, da postignu unapređenje znanja, misli i školstva u Bosni i Hercegovini i promovišu razvoj demokratskog građanskog društva.

2. OSNIVANJE VISOKOŠKOLSKE USTANOVE

Visokoškolska ustanova može biti osnovana kada se utvrdi da postoji društveno ekonomska opravdanost za osnivanje, kada su ispunjeni kriteriji za licenciranje, odnosno kriteriji i standardi za početak rada i obavljanje djelatnosti visokog obrazovanja prema propisanoj proceduri.

2.1. Procedura osnivanja

2.1.1. Donošenje standarda i kriterija

Nadležna obrazovna vlast utvrđuje jasnu proceduru osnivanja i u skladu sa ovim Preporukama definiše standarde i kriterije koji trebaju biti ispunjeni kako bi visokoškolska ustanova ostvarila uslove za početak rada i obavljanje djelatnosti visokog obrazovanja.

2.1.2. Status visokoškolske ustanove u osnivanju

Nadležna obrazovna vlast početno izdaje novoosnovanim visokoškolskim ustanovama dozvolu za osnivanje visokoškolske ustanove u statusu visoke škole, a nakon izvođenja prve generacije studenata postoji mogućnost da visoka škola preraste u univerzitet, ukoliko ispuni propisane uslove za obavljanje djelatnosti visokog obrazovanja na II i III ciklusu studija.

2.1.3. Nezavisnost postupka osnivanja visokoškolske ustanove

Nadležna obrazovna vlast definiše da je postupak osnivanja nezavisan od političkih uticaja, te da je izbjegnuto bilo kakav sukob interesa.

2.1.4. Učesnici u postupku osnivanja visokoškolske ustanove

Učesnici u postupku osnivanja visokoškolske ustanove su:

- osnivač visokoškolske ustanove,
- odgovarajuće komisije stručnjaka,
- nadležne obrazovne vlasti, te
- savjeti, druga ministarstva, predstavnici privrede i sl.

2.1.5. Način podnošenja, potpunost zahtjeva i rok za podnošenje zahtjeva

Nadležna obrazovna vlast svojim aktom o postupku osnivanja visokoškolske ustanove definiše način podnošenja i potpunost zahtjeva za osnivanje visokoškolske ustanove, s tim da se taj zahtjev podnosi najkasnije godinu dana prije početka nove akademske godine.

2.1.6. Elaborat ili akt o opravdanosti osnivanja visokoškolske ustanove

Nadležna obrazovna vlast propisuje da se uz zahtjev za osnivanje prilaže elaborat o opravdanosti osnivanja visokoškolske ustanove ili drugi odgovarajući akt koji sadrži: dokaz o opravdanosti osnivanja visokoškolske ustanove, odnosno postojanja opšte društvene potrebe za obrazovanje određenog profila kadra; status, strukturu i detaljan opis visokoškolske ustanove; ciljeve studija; dužinu trajanja studija; prijedlog nastavnog plana i programa; pravila studiranja; akademske titule; naučna i stručna zvanja koja se stiču po završetku studija; opće i posebne uslove utvrđene standardima i normativima; način finansiranja visokoškolske ustanove. Razlozi za osnivanje visokoškolske ustanove su utemeljeni na realnim i lako dostupnim podacima iz relevantnih izvora.

Elaborat o opravdanosti osnivanja visokoškolske ustanove obavezno sadrži:

- podatke koji potvrđuju opravdanost osnivanja visokoškolske ustanove, odnosno društvenu potrebu za osnivanjem visokoškolske ustanove u određenoj jedinici lokalne samouprave,
- podatke o osnivaču visokoškolske ustanove,
- sjedište i naziv visokoškolske ustanove,

- detaljan opis i status visokoškolske ustanove,
- predviđene organizacione jedinice,
- prijedlog studijskih programa,
- broj potrebnog akademskog i neakademskog osoblja,
- način ispunjavanja propisanih kadrovskih, prostornih i materijalno-tehničkih uslova za izvođenje nastave,
- procjenu i izvore potrebnih finansijskih sredstava za osnivanje i izvođenje studijskih programa, a utvrđuju se na osnovu odgovarajućeg obračuna svih troškova izvođenja i realizacije određenog studijskog programa i broja studenata za koji se traži dozvola za rad na tom studijskom programu.

2.1.7. Stručna komisija za ekspertizu o opravdanosti osnivanja visokoškolske ustanove

Nadležna obrazovna vlast formira posebnu stručnu komisiju koja daje ocjenu društveno-ekonomske opravdanosti osnivanja visokoškolske ustanove zasnovanu, između ostalog, na povezivanju visokog obrazovanja i tržišta rada kroz obrazovne ciljeve i ishode učenja, obrazovanju studenata koji po završetku studija svojim stečenim kompetencijama, primjenom znanja i vještina, radom i društvenim djelovanjem doprinose privrednom razvoju, podizanju životnog standarda i opšteg kvaliteta života svih građana.

Stručnu komisiju čine:

- tri predstavnika akademskog osoblja koji imaju izbor u naučno-nastavno, odnosno umjetničko-nastavno zvanje iz odgovarajuće oblasti,
- predstavnik ministarstva nadležnog za oblast za koju se osniva visokoškolska ustanova,
- predstavnik privrednog sektora.

U slučaju negativne ocjene stručne komisije, donosi se odluka o odbijanju saglasnosti za osnivanje visokoškolske ustanove. Podnosilac zahtjeva nema pravo da podnese isti zahtjev u roku od 2 godine od dana donošenja negativne ocjene.

2.1.8. Komisija za izradu nastavnog plana i programa

Nadležna obrazovna vlast propisuje da osnivač, nakon pozitivne ocjene stručne komisije, imenuje posebnu komisiju za izradu nastavnog plana i programa.

Tu komisiju čine:

- istaknuti predstavnici akademskih i naučnih radnika i stručnjaka iz odgovarajuće naučno-nastavne, odnosno umjetničko-nastavne oblasti, koja će se realizirati na visokoškolskoj ustanovi i u skladu sa zvanjima koja se stiču završetkom studija, te
- predstavnici privrede i prakse,
- po potrebi i drugi učesnici.

2.1.9. Zadaci komisije za izradu nastavnog plana i programa

Pored izrade nastavnog plana i programa, ova komisija donosi i :

- opšti akt o pravilima studiranja,
- nacrt statuta,
- objavljuje konkurs za prijem akademskog osoblja,
- vrši izbor akademskog osoblja za sve uže naučne, odnosno umjetničke oblasti ili nastavne predmete,
- predlaže broj studenata za upis u prvu godinu studija,
- obavlja i druge poslove koje odredi osnivač visokoškolske ustanove, odnosno nadležni obrazovni organ u skladu s zakonom i drugim propisima.

2.1.10. Akt o osnivanju

Nakon završenog rada Komisije za izradu nastavnog plana i programa, osnivač podnosi nadležnoj obrazovnoj vlasti zahtjev za davanje saglasnosti za osnivanje, koji sadrži:

- ocjenu o društveno-ekonomskoj opravdanosti osnivanja visokoškolske ustanove,
- odluku o osnivanju,
- odluku o imenovanju lica ovlašćenog za zastupanje,
- prijedloge studijskih programa,
- prijedlog pravila studiranja,
- prijedlog statuta visokoškolske ustanove,
- prijedlog broja studenata za upis u prvu godinu studija,
- dokaz o objavljenom javnom pozivu za prijem akademskog osoblja i na osnovu prijava kandidata i prijedlog liste akademskog osoblja za zasnivanje radnog odnosa na predviđenim studijskim programima.

Nakon davanja saglasnosti visokoškolskoj ustanovi za osnivanje, visokoškolska ustanova se upisuje u sudski registar u utvrđenom roku. Ako visokoškolska ustanova upisana u sudski registar u utvrđenom roku ne podnese zahtjev za licenciranje, smatra se da je odustala od zahtjeva, na osnovu čega nadležna obrazovna vlast donosi zaključak o obustavi postupka.

2.1.11. Zahtjev za licenciranje

Visokoškolska ustanova nakon upisa u sudski registar, nadležnoj obrazovnoj vlasti podnosi zahtjev za licenciranje.

Uz zahtjev za licenciranje visokoškolska ustanova podnosi:

- ovjerenu fotokopiju rješenja o upisu u sudski registar,
- studijske programe i dokaze o podudarnosti pojedinog studijskog programa, u većem dijelu, sa najmanje tri studijska programa koji se izvode na akreditovanim visokoškolskim ustanovama u zemljama potpisnicama Bolonjske deklaracije,
- dokaz o radnom odnosu sa punim radnim vremenom akademskog i administrativnog osoblja, za sve godine studija na kojima visokoškolska ustanova planira izvoditi nastavu (ugovore o radu i kopije radnih knjižica zaposlenika), u skladu sa Kriterijima za licenciranje visokoškolskih ustanova i studijskih programa,
- odluke o izboru u zvanje za akademsko osoblje,

- nastavni plan svakog pojedinog studijskog programa sa odlukom o utvrđivanju odgovornog akademskog osoblja za izvođenje nastave,
- pregled opterećenja akademskog osoblja angažovanog na visokoškolskoj ustanovi na svim studijskim programima,
- dokaz o poslovnom prostoru i opremi proporcionalno broju studenata koje visokoškolska ustanova namjerava upisati,
- dokaz o izvorima osiguranih finansijskih sredstava za obavljanje djelatnosti, za najmanje jednu generaciju studenata,
- sporazum sa drugom licenciranom i akreditovanom visokoškolskom ustanovom za nastavak i završetak studija u slučaju zatvaranja visokoškolske ustanove ili prestanka izvođenja određenog studijskog programa,
- dokaz o uplaćenim sredstvima za sprovođenje postupka licenciranja.

2.1.12. Komisija za licenciranje

Nadležna obrazovna vlast nakon donošenja akta o osnivanju visokoškolske ustanove i upisa u sudski registar, a na osnovu zahtjeva visokoškolske ustanove za licenciranje, imenuje stručnu komisiju za licenciranje koja provjerava ispunjenost uslova za početak rada i obavljanje djelatnosti visokog obrazovanja.

Komisiju čine:

- tri predstavnika akademskog osoblja koji imaju izbor u naučno-nastavno, odnosno umjetničko-nastavno zvanje iz odgovarajuće oblasti, sa liste domaćih i međunarodnih stručnjaka,
- jedan predstavnik privrede,
- inspektor za sanitarne uslove.

2.1.13. Zadaci komisije za licenciranje

Komisija, u roku od 15 dana od dana osnivanja, predlaže nadležnoj obrazovnoj vlasti:

- status ustanove (univerzitet ili visoka škola),
- studijske programe za koje se predlaže davanje licence za rad,
- stepene i diplome koji se mogu dodjeljivati,
- ispunjenost Kriterija za institucionalnu licencu,
- maksimalan broj studenata koji se mogu upisati na predložene studijske programe koji se mogu licencirati s obzirom na ispunjenost Kriterija.

Ako komisija utvrdi da visokoškolska ustanova ne ispunjava neki od propisanih uslova odrediće rok u kojem je osnivač dužan da otkloni nedostatke. Ako visokoškolska ustanova u zadatom roku koji ne smije biti duži od 60 dana od datuma kojeg je Komisija predala svoj izvještaj ne otkloni nedostatke, nadležna obrazovna vlast donosi rješenje o neispunjavanju uslova za rad i obavljanje djelatnosti visokog obrazovanja.

2.1.14. Rješenje o ispunjavanju kriterija za licenciranje i dozvola za rad

Nadležna obrazovna vlast, na osnovu pozitivne ocjene komisije za licenciranje, donosi rješenje o ispunjavanju kriterija za licenciranje-uslova za početak rada i obavljanje djelatnosti visokog obrazovanja te na osnovu tog rješenja visokoškolskoj ustanovi izdaje licencu - odgovarajući akt kojim se odobrava rad visokoškolske ustanove.

2.1.15. Početak rada

Visokoškolska ustanova može upisivati studente i početi sa radom nakon upisa u sudski registar i Registar visokoškolskih ustanova.

2.1.16. Upis studenata

Licenca-odgovarajući akt kojim se odobrava rad visokoškolske ustanove izdat u tekućoj akademskoj godini, vrijedi za upis studenata za sljedeću akademsku godinu.

2.1.17. Rješenje o privremenoj akreditaciji

Nadležna obrazovna vlast prilikom izdavanja licence novoosnovanoj visokoškolskoj ustanovi izdaje i rješenje o privremenoj akreditaciji. Novoosnovna visokoškolska ustanova je ustanova koja je prvi put osnovana i ima status samostalnog pravnog subjekta. Novoosnovana visokoškolska ustanova kao samostalni pravni subjekt nastaje direktnim osnivanjem, integracijom dvaju ili više postojećih visokoškolskih ustanova, ili istupanjem jedne ili više organizacionih jedinica iz postojeće visokoškolske ustanove i njenim/njihovim sticanjem statusa novog pravnog subjekta, ukoliko zadovoljava Kriterije za licenciranje visokoškolskih ustanova i studijskih programa.

2.1.18. Važenje rješenja o privremenoj akreditaciji

Rješenje o privremenoj akreditaciji može važiti najduže 12 mjeseci od ispunjavanja uslova za podnošenje zahtjeva za akreditaciju. Rješenjem o privremenoj akreditaciji visokoškolska ustanova ne stiče pravo upisa u Državni registar akreditovanih visokoškolskih ustanova u Bosni i Hercegovini.

3. PREPORUKE ZA ZATVARANJE VISOKOŠKOLSKIH USTANOVA

3.1. Nezavisnost postupka zatvaranja visokoškolske ustanove

Nadležna obrazovna vlast definiše svojim aktom postupak zatvaranja visokoškolske ustanove kao potpuno nezavisan postupak od političkih uticaja i zaštićen od bilo kakvih sukoba interesa.

3.2. Razlozi za zatvaranje visokoškolske ustanove

Nadležna obrazovna vlast oduzima dozvolu za rad visokoškolskoj ustanovi-zatvara visokoškolsku ustanovu:

- u slučaju prestanka potrebe za obavljanjem djelatnosti visokog obrazovanja po odluci osnivača, na osnovu dokaza o prestanku opravdanosti obavljanja djelatnosti visokoškolske ustanove, odnosno prestanku postojanja opšte društvene potrebe za obrazovanje određenog profila kadra,
- ukoliko se inspekcijskim nadzorom utvrdi da nisu zadovoljeni minimalni uslovi za obavljanje djelatnosti visokog obrazovanja,
- u slučaju utvrđivanja ništavnosti upisa na osnovu pravosnažne odluke nadležnog suda,
- ukoliko se izvrše statusne promjene visokoškolske ustanove,
- ukoliko ishod dvije uzastopne akreditacije bude negativan. U tom slučaju visokoškolskoj ustanovi oduzima se dozvola za rad na period od četiri godine. Nakon isteka tog perioda, visokoškolska ustanova podnosi zahtjev za liceniranje i dobijanje dozvole za rad, te se na nju primjenjuju pravila koja važe za novoosnovane visokoškolske ustanove,
- ukoliko visokoškolska ustanova u roku ne postupi prema izrečenoj mjeri od strane nadležnog organa,
- i u drugim slučajevima koji su određeni zakonom.

3.3. Brisanje iz sudskog registra

Nadležna obrazovna vlast obavještava nadležni sud o zatvaranju visokoškolske ustanove radi brisanja iste iz sudskog registra. Informaciju o brisanju visokoškolske ustanove iz sudskog registra nadležna obrazovna vlast dostavlja Centru za informisanje i priznavanje dokumenata iz oblasti visokog obrazovanja i Agenciji za razvoj visokog obrazovanja i osiguranje kvaliteta.

3.4. Zaštita studenata u slučaju zatvaranja visokoškolske ustanove

Nadležna obrazovna vlast propisuje da u slučaju prestanka rada visokoškolske ustanove ili prestanka izvođenja studijskog programa zbog oduzimanja licence, osnivač treba upisanim studentima obezbijediti nastavak i završetak studija na istom ili srodnom studijskom programu, koji vodi do istog strukovnog, akademskog ili naučnog zvanja na drugoj odgovarajućoj licenciranoj i akreditiranoj visokoškolskoj ustanovi u Bosni i Hercegovini.

4. PRESTRUKTURIRANJE STUDIJSKIH PROGRAMA

4.1. Svrha prestrukturiranja

Visokoškolska ustanova redovno vrši evaluaciju postojećih licenciranih studijskih programa i to u područjima: identifikacije prevaziđenih sadržaja, odnosa obaveznih i izbornih predmeta, dostignute interdisciplinarnosti studijskog programa, odnosa stručnih predmeta i predmeta iz srodnih i nesrodnih disciplina, odnosa predavanja, vježbi i praktične nastave, efikasnosti zajedničkih predmeta/godina i predmeta na usmjerenjima, spremnosti nastavnog osoblja za reformu nastavnih planova, analize metoda izvođenja nastave, uključivanja rezultata savremenih istraživanja u nastavni proces, usmjerenosti na potrebe tržišta i zapošljavanje, i drugo.

Dobijene informacije se koriste za prestrukturiranje studijskog programa u cilju:

- izmjene kurikuluma u korist izlaznih kompetencija;
- praćenja savremenih naučnih i praktičnih dostignuća;
- osiguranja izlaznih kompetencija koje se traže na tržištu rada;
- povećanja zapošljivosti;
- ispravnog razumijevanja i provođenja bolonjskih ciljeva;
- uvođenja savremenih načina podučavanja usmjerenih na studenta;
- unapređenja kvaliteta nastave, kao i
- povećanja zadovoljstva studenata.

4.2. Učesnici konsultacija u procesu prestrukturiranja

U procesu prestrukturiranja studijskih programa uspostavljaju se mehanizmi konsultacija, sa sljedećim učesnicima:

- subjekti poslovnog okruženja,
- visokoškolske ustanove,
- studenati,
- alumni i
- nadležne obrazovne vlasti.

4.3. Promjene studijskog programa do 20%

Visokoškolska ustanova može izvršiti prestrukturiranje studijskog programa bez saglasnosti nadležne obrazovne vlasti ako se izmjene odnose na sadržajne promjene do 20% programa, i koje ne mjenjaju bitno studijski program, naziv studijskog programa, ishode učenja i kvalifikacije koje se stiču završetkom tog studijskog programa.

5. ZAVRŠNE ODREDBE

Ove Preporuke stupaju na snagu osmog dana od dana objavljivanja u "Službenom glasniku Bosne i Hercegovine ". Stupanjem na snagu ovih preporuka prestaje da važe Preporuke o kriterijima i standardima ministarstvu Republike Srpske, kantonalnim ministarstvima i Brčko

distriktu BiH za osnivanje i zatvaranje visokoškolskih ustanova te za prestrukturiranje studijskih programa ("Službeni glasnik BiH" br. 13/12).

Broj:

Direktor

Banja Luka, _____ .2016.godine

Prof.dr Enver Halilović

OBRAZLOŽENJE

I PRAVNI OSNOV ZA DONOŠENJE PREPORUKA O PROCEDURAMA ZA OSNIVANJE I ZATVARANJE VISOKOŠKLOSKIH USTANOVA TE ZA PRESTRUKTURIRANJE STUDIJSKIH PROGRAMA

Pravni osnov za donošenje Preporuka o procedurama za osnivanje i zatvaranje visokoškolskih ustanova te za prestrukturiranje studijskih programa sadržan je u 48. alineja 3) Okvirnog zakona o visokom obrazovanju u Bosni i Hercegovini („Službeni glasnik BiH“ br. 59/07 i 59/09), članu 6. i članu 12. Statuta Agencije za razvoj visokog obrazovanja i osiguranje kvaliteta („Službeni glasnik BiH“ br. 86/09).

II RAZLOZI ZA DONOŠENJE PREPORUKA

Razlozi za donošenje Preporuka o procedurama za osnivanje i zatvaranje visokoškolskih ustanova te za prestrukturiranje studijskih programa temelji se definisanju harmoniziranih kriterija i standarda za osnivanje i zatvaranje visokoškolskih ustanova te za prestrukturiranje studijskih programa zbog različito uređene ove oblasti na teritoriji Bosne i Hercegovine, zatim što prethodne Preporuke nisu bile jednako prihvaćene od nadležnih obrazovnih vlasti te iste predstavljaju važan preduslov za proces akreditacije visokoškolskih ustanova i studijskih programa u Bosni i Hercegovini.

III USKLAĐIVANJE PROPISA SA EVROPSKIM ZAKONODAVSTVOM

Pri izradi propisa nije bilo posebnih zahtjeva za usklađivanjem sa evropskim zakonodavstvom budući da tekst propisa prati odredbe Okvirnog zakona o visokom obrazovanju u Bosni i Hercegovini koji inkorporira zahtjeve visokog obrazovanja u skladu sa ciljevima Bolonjskog procesa.

IV OBRAZLOŽENJE PREDLOŽENIH RJEŠENJA

Navedenim dokumentom date su preporuke o kriterijima i standardima za opravdanost osnivanja visokoškolske ustanove, osnivanje i zatvaranje visokoškolskih ustanova, te za prestrukturiranje studijskih programa.

Cilj preporuka je da visokoškolske ustanove osiguraju primjenu najviših standarda u obavljanju djelatnosti visokog obrazovanja, da postignu unapređenje znanja, misli i školstva u Bosni i Hercegovini i promovišu razvoj demokratskog građanskog društva.

Visokoškolska ustanova može biti osnovana kada nadležna obrazovna vlast utvrdi da postoji društveno ekonomska opravdanost za osnivanje, kada su ispunjeni kriteriji za licenciranje, odnosno kriteriji i standardi za početak rada i obavljanje djelatnosti visokog obrazovanja prema propisanoj proceduri. Nadležna obrazovna vlast utvrđuje jasnu proceduru osnivanja, i u skladu sa Preporukama o procedurama za osnivanje i zatvaranje visokoškolskih ustanova te za prestrukturiranje studijskih programa definiše standarde i kriterije koji trebaju biti ispunjeni kako bi visokoškolska ustanova ostvarila uslove za početak rada i obavljanje djelatnosti visokog obrazovanja.

Učesnici u postupku osnivanja visokoškolske ustanove su: osnivač visokoškolske ustanove, odgovarajuće komisije stručnjaka i nadležne obrazovne vlasti, te savjeti, druga ministarstva, predstavnici privrede i sl.

Nadležna obrazovna vlast posebnim aktom o postupku osnivanja visokoškolske ustanove, definira način podnošenja zahtjeva i Eleborat o opravdanosti osnivanja visokoškolske

ustanove ili druge dokumente kojim će se predočiti: opravdanost osnivanja visokoškolske ustanove, odnosno postojanje društvene potrebe za obrazovanjem određenog profila kadra, status, struktura i detaljan opis visokoškolske ustanove, ciljevi studija, dužina trajanja studija, nastavni plan i program, pravila studiranja, akademske titule, naučna i stručna zvanja koja se stiču po završetku studija, opšte i posebne uslove utvrđene standardima i normativima, način finansiranja visokoškolske ustanove. Procjena opravdanosti osnivanja visokoškolske ustanove treba biti predmet ocjene stručne komisije za ekspertizu o opravdanosti osnivanja visokoškolske ustanove.

Kod postupka osnivanja nadležna obrazovna vlast propisuje da osnivač nakon usvajanja elaborata ili drugog odgovarajućeg akta, imenuje posebnu komisiju za izradu nastavnog plana i programa koja donosi opći akt o pravilima studiranja, objavljuje konkurs i vrši izbor akademskog osoblja za sve uže nastavne, naučne, odnosno umjetničke oblasti ili nastavne predmete, predlaže broj studenata za upis u prvu godinu studija i obavlja druge poslove koje odredi osnivač visokoškolske ustanove ili nadležna obrazovna vlast u zavisnosti kako je propisano zakonom i drugim propisima. Komisiju čine istaknuti predstavnici akademskih i naučnih radnika i stručnjaka iz odgovarajuće naučno-nastavne, odnosno umjetničko-nastavne oblasti, koja će se realizirati na visokoškolskoj ustanovi i u skladu sa zvanjima koja se stiču završetkom studija, uključujući i predstavnike privrede i prakse.

Akt o osnivanju se donosi na osnovu pozitivnog mišljenja komisije za izradu nastavnog plana i programa i sadrži: ocjenu o društveno-ekonomskoj opravdanosti osnivanja visokoškolske ustanove, odluku o osnivanju, odluku o imenovanju lica ovlaštenog za zastupanje, prijedloge studijskih programa, prijedlog pravila studiranja, prijedlog statuta visokoškolske ustanove, prijedlog broja studenata za upis u prvu godinu studija, dokaz o objavljenom javnom pozivu za prijem akademskog osoblja i na osnovu prijave kandidata i prijedlog liste akademskog osoblja za zasnivanje radnog odnosa na predviđenim studijskim programima.

Nakon donošenja akta o osnivanju visokoškolske ustanove, nadležna obrazovna vlast imenuje komisiju za licenciranje koja treba da utvrdi ispunjenost propisanih uslova za početak rada i obavljanja djelatnosti visokog obrazovanja. Nadležna obrazovna vlast na osnovu pozitivne ocjene komisije za licenciranje donosi rješenje o ispunjavanju uslova za početak rada i obavljanje djelatnosti visokog obrazovanja, a na osnovu tog rješenja izdaje licencu-odgovarajući akt kojim se odobrava rad visokoškolske ustanove.

Kod zatvaranja visokoškolskih ustanova nadležna obrazovna vlast svojim aktom definiše postupak zatvaranja visokoškolskih ustanova. Postupak treba biti nezavisan od političkih uticaja. U navedenom aktu trebaju biti nabrojani razlozi za prestanak rada visokoškolske ustanove.

U slučaju prestanka rada visokoškolske ustanove ili prestanka izvođenja studijskog programa zbog oduzimanja licence, osnivač treba upisanim studentima obezbijediti nastavak i završetak studija na istom ili srodnom studijskom programu, koji vodi do istog strukovnog, akademskog ili naučnog zvanja na drugoj odgovarajućoj licenciranoj i akreditiranoj visokoškolskoj ustanovi u Bosni i Hercegovini.

Visokoškolska ustanova redovno vršiti evaluaciju postojećih licenciranih studijskih programa kako bi se osiguralo da studijski program prati određena naučna i praktična dostignuća, razvoj obrazovnog procesa, potrebe tržišta i zapošljavanje, i drugo.

Kod prestrukturiranja studijskog programa, visokoškolska ustanova može izvršiti prestrukturiranje studijskog programa bez saglasnosti nadležne obrazovne vlasti ako se izmjene odnose na sadržajne promjene do 20% programa, a koje ne mijenjaju bitno studijski program, naziv studijskog programa, ishode učenja i kvalifikacije koje se stiču završetkom tog studijskog programa.

U završnim odredbama propisano je da Preporuke stupaju na snagu osmog dana od dana objavljivanja u „Službenom glasniku Bosne i Hercegovine“. Stupanjem na snagu ovih preporuka prestaje da važe Preporuke o kriterijima i standardima ministarstvu Republike Srpske, kantonalnim ministarstvima i Brčko distriktu BiH za osnivanje i zatvaranje visokoškolskih ustanova, te za prestrukturiranje studijskih programa ("Službeni glasnik BiH", broj: 13/12).

V KONSULTACIJE U IZRADI PROPISA

Nakon provedenog postupka javnih konsultacija navest će se razlozi eventualnih prihvatanja ili odbijanja pristiglih komentara.

VI FINANSIJSKA SREDSTVA

Za provođenje Preporuka nisu potrebna posebna finansijska sredstva.

VII PREISPITIVANJE PREPORUKA

Preispitivanju Preporuka pristupiće se u zavisnosti od njegove primjene u praksi, i eventualnih inicijativa nadležnih obrazovnih vlasti u BiH.